

# “Marcho. L’ultima bandiera” Il docufilm presentât su Rai Storia al sarà disponibil ancje su RaiPlay

*Al conte la storie di Marc di Murùs, l’ultin puartebandiere dal Patriarcjât di Aquilee che i à fat cuintri ae invasion di Vignesie tor dal 1420. Une coproduzion ARLeF e Arte Video, cu la regjie di Marco Fabbro e cui aprofondiments storics dal innomenât medievalist Franco Cardini.*

“A” l’è lâit in onde in prime assolude su Rai Storia, te transmission “5000 anni e più. La lunga storia dell’umanità” e in curt al sarà disponibil ancje su RaiPlay. Come che al à marcât il condutôr dal program, Giorgio Zanchini, “Marcho. L’ultima bandiera” al è une ocasion straordinaria par scuvierzi aspiets pôc cognossûts e une vore inmagants de storie dal Friûl, che si incrose cun events impuartants de storie europeane.

Il docufilm, une coproduzion ARLeF e Arte Video, cu la regjie di Marco Fabbro, al conte une vicende restade platade par 500 agns, discuvierste tor dal 1986, intant che si fasevin lavôrs di restaur de residence fortificade *La Brunelde* di Feagne, in graciis di une letare sbrissade fûr des pagjinis di un libri conservât inte biblioteche. La storie e je chês di Marc di Murùs, l’ultin puartebandiere dal Stât patriarcjâl di Aquilee. Unic nobil che i à fat cuintri ae invasion di Vignesie, tor dal 1420.

Realizade cul contribût de Friuli Venezia Giulia Film Commission e dal Fons pal audiovisif dal Friûl-Vignesie Julie, la opare e je stade preseade pe grande precision vude te ricercje filologjiche di ogni detai. Il prodot che al rive al public al è di grande cualitât, ancje in graciis dai aprofondiments storics dal prof. Franco Cardini, innomenât medievalist e sagjist prolific che il public televisif al cognòs ben; di Alberto Travain, autôr e curadôr di variis publicazions su la figure di



La locandine dal docufilm

Marc; de prof.re Flavia Maria De Vitt, docente di Storie medievâl te Universitât dal Friûl; di William Cisilino, diretôr de ARLeF e dal prof. Gianfranco Ellero, autôr di monografiis e saçs su la storie dal Friûl.

Il film al è stât zirât in vot ambientazions diferentis dal Friûl e pe sô realizazion a son stadis cjapadis drenti plui di dusinte personis.

Pe ocasion de Fieste de Patrie, ai 3 di Avrîl dal 2025, il prof. Franco Cardini al sarà a Udin par une proiezion speciâl dal film al Cinema Visionario. E simpri in Avrîl, “Marcho. L’ultima bandiera” al sarà in onde su RaiPlay, cussì a podaran viodilu ancje i furlans tal forest (si varà di jentrâ te liste dai programs e sielzi il titul de transmission), e disponibil ancje intune confezion speciâl che e varà drenti lis versions DVD, Blu-ray HD e Blu-ray 2K. Dal stes mês, ator pal Friûl a son ancje previodudis lis proieziions risiervadis aes scuelis secundariis di I e di II grât.

## Assegnade a Sophie Mangutsch la borse di studi sul furlan e su lis sôs lenghis “sûrs” (rumanz e ladin)

Sophie Mangutsch e je la vincidore de borse di studi par un dotorât di ricercje in Linguistiche, promovût de Libare Universitât di Bolzan e de Agenzie regionâl pe lenghe furlane (ARLeF), in cooperazion cu la Universitât di Verone. Il titul de borse al è “Analisi comparade des misuris di tutele de lenghe rumance grisonese, ladine brissinotirolese e furlane”. Il setôr di studi al è duncje la sociolinguistiche, cuntun interès particolâr pe tutele juridiche e pes politichis linguisticis publichis che a tocjin lis trê lenghis di minorance protagonisticis dal progjet: il rumanz dai Grisons, il ladin dolomitic e il furlan. Il cors di dotorât si sviluperà tai trê agns academics 2024/25 – 2026/27 e al cjaparà drenti une ativitât specifiche di ricercje che Sophie Mangutsch e fasarà te Agenzie regionâl pe lenghe furlane, par almancul doi mês.